

*ob turp.* Eadem porro obtinet tam in meretrice occulta, quam publica. Illa enim, quæ extra lupanar passim se prostituit, cum vere & formaliter sit meretrix *L. 43. pr. de R. N. vid. C. I. num. 18.* idem quoque circa eam jus observandum est, quod locum habet in publica. Accedit, quod si quæ alia mulier præter meretricem ob stuprum acceperit, datum non possit condici ob utriusque & dantis & accipientis turpitudinem *d. L. 4. pr. ff. de cond. ob turp.* Nec interest, utrum actus ille fornicationis, pro quo aliquid datur, subsecutus fuerit, aut non fuerit: nam repetitio ex conditione causa data causa non secuta cessat, si ob causam inhonestam aliquid datum fuerit *L. 1. pr. ff. de cond. caus. dat.* qualis est in re præsentis *d. L. 4. pr. ff. de cond. ob turp.* Neque ea sententia tantum in Foro exteriori recepta est; sed interiori etiam & Conscientiæ probari videtur posse, uti multis probatur. Cum enim quæstus meretricius ex donatione proficiscatur; donatio autem titulus justus sit & ad dominium transferendum habilis, ex quo quis salva conscientia aliquid accipere, & acceptum tanquam suum retinere liceat: sequitur etiam, quod meretrix quæstum istum accipiendo suum faciat, eumque ceu juste sibi acquisitum illæsa conscientia retinere possit. Deinde asseri de meretrice nequit, quod suum cuiquam auferat: cum, si amasium eum supponamus, qui sui juris & liberam disponendi de rebus suis facultatem habeat, quicquid ea accipiat, à Domino rem suam transferre volente & consulto dante accipiat. Sed hæc & quæ ab aliis afferuntur, *vid. D. Brunneinan. in Append. ad c. 4. de R. J. in 6. num. 123. seqq.* speciosa quidem sunt; verum si penitus inspiciantur, parum in se roboris habent. Etenim certum nobis est ac indubitatum; quod ad alicujus rei acquisitionem in Foro Conscientiæ solus titulus justus non sufficiat; sed insuper desideretur, ut persona acquirens omni careat vitio, exemplo usucipientis *c. 5. § ult. X. de Prescription.* Inter ea autem vitia personæ cum primis referendus est defectus legitimationis personæ sive habilitatis ad acquirendum. Omnis vero iste legitimam personam siveabilem ad acquirendum sustinere dicitur, qui utilis aliis esse potest, sive